




COVID-19, Përmbledhje mbi Masat e Ndërmarra dhe Aktet Përkatëse

13 prill 2020

Përgatitur nga Sekretariati i Këshillit të Investimeve

Historiku i Dokumentit

Versioni	Përditësuar	Arsyeja	Publikuar
01	24/03/2020	- Ndërtimi i strukturës së dokumentit - Listimi i masave për periudhën 9 – 24 mars 2020	26/03/2020
02	31/03/2020	Shtuar përmbajtje e re (përditësime gjatë periudhës 25-31 mars 2020): - Kapitulli 3: Masat në kuadër të planit financiar (kapitull i ri) - Kapitulli 4: Veprimtaritë gjyqësore (seksion i ri në kapitull ekzistues)	01/04/2020
03	05/04/2020	Shtuar përmbajtje e re (përditësime gjatë periudhës 1-5 prill 2020): - Kapitulli 3, Seksioni 4: Shtyrja e pagesës së qirave për disa kategori të vecanta - Kapitulli 3, Seksioni 5: Njoftim i DPT mbi Mënyrën e Aplikimit për Përfitimin e Lehtësirave të Mësipërme në Lidhje me Qiranë - Kapitulli 3, Seksioni 6: Njoftim i OSHEE për Faljen e Kamatvonesave - Kapitulli 4, Seksioni: Tregtia në Kuadrin e CEFTA-s - Kapitulli 4, Seksioni: Veprimtaritë Përmbartimore, Ndërmjetësimit dhe Falimentimit	06/04/2020
04	12/04/2020	Shtuar përmbajtje e re (përditësime gjatë periudhës 6-12 mars 2020): - Kapitulli 1, pika 7-Garancia Sovrane - Kapitulli 4, seksioni- Oraret e lëvizjes dhe kufizime të tjera - Kapitulli 5, pika 2- Vendimmarrja e BSH-masa shpesh	13/04/2020

Përmbledhje

I.	HYRJE.....	3
II.	PLANI FINANCIAR PËR PËRBALLIMIN E PASOJAVE TË COVID-19	3
III.	MASAT NË KUADËR TË PLANIT FINANCIAR	4
IV.	KUADRI LIGJOR/NËNLIGJOR DHE MASAT E TJERA	11
	TË PËRGJITHSHME.....	11
	MASA ADMINISTRATIVE/SANKSIONE	13
	TREGTIA NË KUADRIN E CEFTA-s	17
	VEPRIMTARITË GJYQËSORE	18
	VEPRIMTARITË PËRMBARIMORE, TË NDËRMJETËSIMIT DHE FALIMENTIMIT	19
	KONTRATAT E PASTRIMIT DHE TRANSPORTIT PUBLIK	20
	KOHËZGJATJA E PUNËS NË INSTITUCIONET SHTETËRORE	21
	ORARET E LËVIZJES DHE KUFIZIME TË TJERA.....	21
V.	VENDIME DHE NJOFTIME TË TJERA TË RËNDËSISHME NGA ORGANET MBIKËQYRËSE DHE RREGULLATORE	25

I. HYRJE

Nisur nga situata e krijuar në vend nga COVID-19 që prej datës 9 Mars 2020, në vend janë ndërmarrë një sërë masash të cilat kanë ardhur duke u përshkallëzuar. Dinamika e akteve ligjore dhe nënligjore me të cilat janë marrë këto masa me natyrë shtrënguese/kufizuese në funksion të kontrollit të situatës së epidemisë dhe uljes së numrit të të infektuarve nga COVID-19, ka qenë shumë e madhe. Së fundmi, Qeveria publikoi edhe një plan masash në kuadër të mbështetjes financiare për individët dhe bizneset. Në këtë përmbledhje e cila nuk synon të jetë shteruese, jepet informacion mbi aktet ligjore dhe nënligjore më kryesore të miratuara deri më tani dhe të zbatueshme gjatë kohëzgjatjes së COVID-19, si edhe të masave dhe detyrimeve të adoptuara me to.

Informacioni në këtë përmbledhje është i përditësuar deri më **12.04.2020** dhe synon t'u vijë në ndihmë të gjithë bizneseve apo punonjësve të tyre dhe të gjithë partnerëve të Këshillit të Investimeve dhe Sekretariatit, si edhe të shërbejë modestisht në rritjen e ndërgjegjësimit për zbatimin vullnetar të masave dhe të detyrimeve të vendosura.

Informacioni për këto masa është bërë me dije rast pas rasti për publikun, individët dhe bizneset nga media e shkruar dhe elektronike, si edhe në faqet zyrtare të institucioneve të administratës publike (si p.sh.: [Ministria e Financave dhe Ekonomisë](#), [Ministria e Shëndetësisë dhe Mbrojtjes Sociale](#), [Qendra e Botimeve Zyrtare-QBZ](#)), të cilat sugjerohet të konsultohen kohë pas kohe për informacion të përditësuar nisur nga zhvillimet shumë dinamike.

II. PLANI FINANCIAR PËR PËRBALLIMIN E PASOJAVE TË COVID-19

- Plani financiar u lançua më 19.03.2020 dhe ka hyrë në fuqi që më 21.03.2020 si Akti Normativ Nr. 6 datë 21.03.2020 [Për Disa Ndryshime dhe Shtesa Në Ligjin Nr.88/2019, "Për Buxhetin e Vitit 2020"](#). Ky akt normativ do të shoqërohet nga udhëzimet përkatëse për zbatimin e tij.
- Plani përmban 7 pika të mëposhtme:
 - (1) **2.5 miliardë lekë, ose 25 milionë dollarë** në dispozicion të Ministrisë së Shëndetësisë, për pajisje e materiale mjekësore apo mbështetje të stafeve mjekësore;

- (2) **10 miliardë lekë, ose 100 milionë dollarë**, përmes instrumentit të një **garancie sovrane** për kompanitë që kanë vështirësi objektive për të paguar pagat e punonjësve.
- (3) **6.5 miliardë lekë, ose 65 milionë dollarë për nevojat më imediate:**
 - a) Për shtresat më në nevojë;
 - b) Për biznesin e vogël;
 - c) Për papunësinë e mundshme për shkak të luftës.
- (4) **2 miliardë lekë, ose 20 milionë dollarë**, që vihet në dispozicion të Ministrisë së Mbrojtjes, për **Operacionin Humanitar**.
- (5) **1 miliardë lekë, ose 10 milionë dollarë, si fond rezervë** për Këshillin e Ministrave, për çdo urgjencë të paparashikueshme.
- (6) **Fshirja përgjithmonë e kamatvonesave për debitorët aktivë** që kanë konsum energjie sot, familjarë apo biznes i vogël, me efekt financiar deri në 15 miliardë lekë, ose 150 milionë dollarë. Nga kjo masë do të përfitojnë 211 mijë e 24 abonentë.
- (7) **Riskedulimi në 6 mujorin e dytë të vitit 2020 dhe në vazhdim, i tatimit-fitimit për të gjithë biznesin në fashën nga 2 deri në 14 milionë lekë.** Shtyrja e dorëzimit të bilanceve për një periudhë deri në 1 qershor të këtij viti për bizneset që dorëzojnë bilancet në QKB online ose drejtëpërdrejtë.

Për më shumë informacion vizitoni lidhjet e mëposhtme:

- <https://qbz.gov.al/eli/fz/2020/45/2c644067-b09f-4c65-adb5-aedf5fbc647f>
- <https://kryeministria.al/newsroom/plani-financiar-per-perballimin-e-pasojave-te-covid-19/>
- <http://www.financa.gov.al/njoftim-per-shtyp-2/>

III. MASAT NË KUADËR TË PLANIT FINANCIAR

1. SHTYRJA E AFATIT TË DEKLARIMIT TË BILANCIT KONTABËL DHE PAGIMIT TË TATIMIT-FITIMIT

- Bilanci kontabël, së bashku me anekset e tij, dorëzohet brenda datës 31 korrik 2020;

- Për tatimpaguesit me qarkullim deri në 14 milion lekë, tatimi i llogaritur në bazë të deklaratës vjetore të të ardhurave të tatueshme paguhet nga tatimpaguesi me urdhërpagesën përkatëse, **brenda gjashtë mujorit të dytë 2020.**
- Për tatimpaguesit me qarkullim deri në 14 milion lekë, këstet e tatimit të tremujorit të parë dhe të dytë të vitit 2020, parapaguhet në llogarinë e organeve tatimore, **brenda datës 31 dhjetor 2020.** Këstet paraprake të tatimit mbi fitimin, të tremujorit të tretë dhe të katërt të vitit 2020, parapaguhet në llogarinë e organeve tatimore, **brenda datës 31 dhjetor 2020.**
- Përjashtimisht parashikimeve të nenit 15 të Ligjit nr.9632, datë 30.10.2006, “Për sistemin e taksave vendore”, të ndryshuar, pra për tatimpaguesit me përgjegjësi tatimore Tatim i Thjeshtuar mbi Fitimin me qarkullim vjetor nga 5 (pesë) deri në 8 (tetë) milionë lekë, pagesat e kësteve të parapagimit të tatimit të thjeshtuar mbi fitimin kryhen:
 - për tremujorin e parë dhe të dytë të vitit 2020 brenda datës 20 tetor 2020;
 - për tremujorin e tretë dhe të katërt të vitit 2020 brenda datës 20 dhjetor 2020.

Referenca:

- **Akt Normativ Nr.10, datë 26.3.2020** *Për një ndryshim në ligjin nr.8438, datë 28.12.1998, “Për Tatimin mbi të Ardhurat”, të ndryshuar* - Fletore Zyrtare Nr.52/2020. Për përmbajtjen e plotë të aktit kliko [këtu](#).
- **Akt Normativ Nr. 11, datë 27.3.2020** *Për një shtesë në ligjin nr.9632, datë 30.10.2006, “Për Sistemin e Taksave Vendore”, të ndryshuar* - Fletore Zyrtare Nr.53/2020. Për përmbajtjen e plotë të aktit kliko [këtu](#).
- Për përmbajtjen e plotë të njoftimit të DPT kliko [këtu](#).

2. NDIHMA FINANCIARE PËR KATEGORI TË VEÇANTA

A. PËR TË PUNËSUARIT NË SUBJEKTE ME TË ARDHURA VJETORE 14 MILIONË LEKË

- ***Kushtet dhe kriteret që duhet të plotësojnë subjektet:***
 - (1) për vitin 2019 të kenë realizuar të ardhura deri në 14 milionë lekë;
 - (2) duhet të kenë ndërprerë aktivitetin gjatë periudhës së COVID-19.

- ***Përfitues të ndihmës financiare janë:***
 - (1) personat fizikë të vetëpunësuar;
 - (2) punonjësit e papaguar të familjes të personit fizik tregtar;
 - (3) të punësuarit në personat fizikë tregtarë.
 - (4) të punësuarit në personat juridikë
- ***Ndihma financiare, që përfitojnë kategoritë e mësipërme është e barabartë me pagën minimale në fuqi, 26 000 (njëzet e gjashtë mijë) lekë.***
- ***Subjektet përfituese duhet të plotësojnë një formular duke filluar nga data 1 PRILL me këto të dhëna që depozitohet në DPT:***
 - (1) Të dhënat identifikuese të subjektit tatimpagues të pajisur me NUIS
 - (2) Të dhënat identifikuese të përfituesve, përfshirë të vetpunësuarit, punonjësit e papaguar të familjes dhe të punësuarit:
 - emrin, atësinë, mbiemrin
 - numrin personal të identifikimit të individit
 - bankën ku përfituesi ka llogarinë rrjedhëse bankare
 - IBAN të llogarisë bankare të individit përfitues

B. PËR TË PAPUNËT DHE PËRFITUESIT E NDIHMËS EKONOMIKE

- Përfituesit e pagesës nga papunësia dhe të ndihmës ekonomike përfitojnë dyfishin e pagesës mujore respektive të përcaktuar përkatësisht me VKM Nr. 597 datë 04.09.2019 dhe VKM Nr.161 datë 21.03.2018.

Referenca:

- **VKM Nr. 254, datë 27.3.2020** *Për përcaktimin e procedurave, të dokumentacionit dhe të masës së përfitimit të ndihmës financiare për të punësuarit në subjektet e biznesit me të ardhura vjetore deri 14 milionë lekë, ndihmës ekonomike e të pagesës të së ardhurës nga papunësia gjatë periudhës së fatkeqësisë natyrore, të shpallur si pasojë e COVID-19 - Fletore Zyrtare Nr.53/2020*

Për përmbajtjen e plotë të aktit kliko [këtu](#).

3. ULJA E PAGAVE TË DISA FUNKSIONARËVE TË LARTË DHE KALIMI I SHUMAVE TË PAPAGUARA NË FONDIN ANTI-COVID-19

- Kryeministri, Zëvendëskryeministri dhe ministrat, gjatë periudhës së gjendjes së epidemisë së shkaktuar nga COVID-19 deri në përfundim të saj, por jo më shumë se tre muaj, përfitojnë pagë mujore neto në masën 50% të pagës mujore neto aktuale.
- Nëpunësit e institucioneve të administratës shtetërore, të cilët janë anëtarë të këshillave, të bordeve apo të komisioneve të institucioneve të administratës shtetërore, të institucioneve publike të arsimit të lartë, të njësive të fondeve speciale, të ndërmarrjeve shtetërore dhe të shoqërive tregtare me kapital shtetëror mbi 50%, për periudhën nga data 1 Prill 2020 deri në përfundim të gjendjes së epidemisë së shkaktuar nga COVID-19, por jo më shumë se tre muaj, nuk e përfitojnë shpërblimin mujor përkatës.
- Përfshihen nga zbatimi si më sipër, nëpunësit e institucioneve të administratës shtetërore të cilët janë anëtarë të këshillave, bordeve apo komisioneve të sistemit të Ministrisë së Shëndetësisë dhe Mbrojtjes Sociale.

Referenca:

- **VKM Nr.267, date 31.3.2020** *“Për trajtimin e përkohshëm financiar mujor të disa funksionarëve dhe nëpunësve të administratës shtetërore, gjatë periudhës së gjendjes së epidemisë së shkaktuar nga Covid-19”- Fletore Zyrtare Nr.55/2020*

Për përmbajtjen e plotë të aktit kliko [këtu](#).

4. SHTYRJA E PAGESËS SË QIRAVE PËR DISA KATEGORI TË VEÇANTA

- **Të gjithë qiramarrësit individë**, të cilët kanë kontratë qiraje për banesë apo çdo dokument tjetër që vërteton marrëdhënien kontraktore qiradhënës–qiramarrës, përpara shpalljes së gjendjes së epidemisë, që kanë kontratë pune por e kanë pezulluar/zgjidhur atë si pasojë e gjendjes së shkaktuar nga COVID-19, nuk do ta paguajnë detyrimin e qirasë për dy muaj, prill dhe maj 2020.

- **Të gjithë qiramarrësit studentë**, të cilët kanë kontratë qiraje për banesë apo çdo dokument tjetër që vërteton marrëdhënien kontraktore qiradhënës– qiramarrës, përpara shpalljes së gjendjes së epidemisë, nuk do ta paguajnë detyrimin e qirasë për dy muaj, prill dhe maj 2020.
- **Të gjithë qiramarrësit persona fizikë/juridikë me të ardhura deri në 14 000 000 (katërmëdhjetë milionë) lekë në vit**, të cilët kanë kontratë noteriale qiraje për zhvillimin e aktivitetit të tyre ekonomik, të nënshkruar përpara shpalljes së gjendjes së epidemisë, dhe e kanë ndaluar aktivitetin si pasojë e gjendjes së shkaktuar nga COVID-19, nuk do ta paguajnë detyrimin e qirasë për dy muaj, prill dhe maj 2020.
- Detyrimi i prapambetur i këtyre dy muajve do të paguhet nga qiramarrësi, në mënyrë proporcionale dhe të dakordësuar me qiradhënësin, pas muajit maj 2020. Për ato kontrata që përfundojnë përpara afatit 31 maj 2020, detyrimi i prapambetur do të paguhet nga qiramarrësi brenda tre muajve pas datës 31 maj 2020.
- Të gjithë qiramarrësit e përcaktuar në këtë pikë, të cilët kanë ankesë për qiradhënësin si pasojë e moszbatimit të detyrimeve të mësipërme, do t'i drejtohen Drejtorisë së Përgjithshme të Tatimeve nëpërmjet komunikimit elektronik.
- Qiradhënësit, të cilët nuk e zbatojnë këtë pikë, dënohen me gjobë në masën e pesëfishit të qirasë mujore përkatëse.

Referenca:

- **AKT NORMATIV Nr. 12, datë 2.4.2020** “Për një shtesë në aktin normativ nr.3, datë 15.3.2020, të Këshillit të Ministrave, “Për Marrjen E Masave Të Veçanta Administrative Gjatë Kohëzgjatjes Së Periudhës Së Infeksionit Të Shkaktuar Nga Covid-19”, të ndryshuar. **Fletore Zyrtare Nr.57/2020**

Për përmbajtjen e plotë të aktit kliko [këtu](#).

5. NJOFTIM I DPT MBI MËNYRËN E APLIKIMIT PËR PËRFITIMIN E LEHTËSIRAVE TË MËSIPËRME NË LIDHJE ME QIRANË

- Individët qiramarrës dhe studentët qiramarrës, duhet të aplikojnë në adresën e email qirajaime@tatime.gov.al, sipas Formularit Nr. 1 në rastet kur marrëdhënia midis palëve

është Individ me Individ ose sipas Formularit Nr. 2 kur marrëdhënia midis palëve është Individ me Tatimpagues. Në çdo rast aplikimit i duhet bashkëlidhur kopje e kontratës së qirasë apo çdo dokument tjetër që vërteton marrëdhënien kontraktuale.

- Personat fizikë/juridikë të regjistruar, duhet të aplikojnë në llogarinë e tyre në e-filing, tek menuja “Çështjet e mia”, duke ngarkuar Formularin e aplikimit Nr. 3, kur marrëdhënia midis palëve është Tatimpagues me Tatimpagues ose sipas Formularin Nr. 4 kur marrëdhënia është Tatimpagues me Individ. Në çdo rast aplikimit i duhet bashkëlidhur kopje e kontratës noteriale të qirasë.
- Të gjithë qiramarrësit e përcaktuar më lartë në këtë njoftim, të cilët kanë ankesë për moszbatim të Aktit Normativ nga ana e qiradhënësit, pasi të kenë plotësuar të gjithë procedurën më sipër, të dërgojnë një email në adresën ankesa.qirajaima@tatime.gov.al, me objekt/titull të Email-t, NIPT në rastin e Personave fizikë/juridikë të regjistruar, dhe NID (Numri Unik i Identifikimit) të Letërnjoftimit në rastin e individëve apo studentëve, duke përshkruar arsyen e ankesës.

Për përmbajtjen e plotë të njoftimit kliko [këtu](#).

6. NJOFTIM I OSHEE PËR FALJEN E KAMATVONESAVE

- Paketat lehtësuese të OSHEE për faljen e kamatvonesave për abonentët debitorë aktivë:
 - (a) **Kategoria e parë e përfituesve- debitorët që kanë aktmarrëveshje me OSHEE për detyrimet e akumuluar.**
 - 90,194 abonentë, prej të cilëve 88,518 janë familjarë dhe pjesa tjetër subjekte biznesi, që aktualisht kanë një aktmarrëveshje me OSHEE për shlyerjen me këste të borxheve të akumuluar, krahas pagesës së faturës mujore.
 - Për këta abonentë falen të gjitha kamatvonesat e akumuluar deri më 31 Dhjetor 2019 dhe riskedulohen menjëherë aktmarrëveshjet aktuale.
 - Afati për faljen e kamatëvonesës dhe riskedulimin e aktmarrëveshjeve të kësaj kategorie abonentësh është brenda 30 Prill 2020.
 - (b) **Kategoria e dytë e përfituesve- debitorët që nuk kanë një aktmarrëveshje me OSHEE për detyrimet e akumuluar.**
 - 137,374 mijë abonentë debitorë (familjarë dhe biznese) të cilët nuk kanë një aktmarrëveshje të nënshkruar me kompaninë për shlyerjen e detyrimit të mbartur.
 - Për të përfituar faljen e kësaj vlere të kamatës, brenda datës 30 Qershor 2020 (nëse nuk ka reduktime të mëtejshme të orareve të qarkullimit), këta debitorë duhet të

lidhin një aktmarrëveshje me kompaninë dhe të dakordësohen për të paguar me këste vetëm principalin e akumuluar deri në fund të vitit 2019.

Për përmbajtjen e plotë kliko [këtu](#).

7. MIRATIMI I GARANCISË SHTETËRORE TË HUASË ME BANKAT E NIVELIT TË DYTË PËR PAGAT E TREGTARËVE OSE SHOQËRIVE TREGTARE, AKTIVITETI I TË CILAVE ËSHTË PREKUR COVID-19

- Në vijim të zbatimit të planit financiar për rimëkëmbjen nga Covid-19 u miratua VKM Nr. 277 datë 06.04.2020 e cila parashikon:
 - (1) Linjën e garancisë shtetërore, në vlerën 11 000 000 000 (njëmbëdhjetë miliard) lekë, në favor të 12 bankave të nivelit të dytë, pjesë e skemës së garancisë që do të mundësojë huadhënien për të përballuar pagat e tregtarëve ose të shoqërive tregtare, aktiviteti i të cilave është mbyllur ose është ndikuar me ulje të xhiros, si pasojë e vendimeve të Këshillit të Ministrave dhe urdhrave të nxjerra nga Ministria e Shëndetësisë dhe Mbrojtjes Sociale, në kuadër të menaxhimit të situatës së krijuar nga COVID-19.
 - (2) Ministri i Financave dhe Ekonomisë ka të drejtë që, pas 60 (gjashtëdhjetë) ditëve nga data e nënshkrimit të marrëveshjeve përkatëse të garancisë, t'i propozojë Këshillit të Ministrave nëse është e nevojshme, rialokimin e shumës së garancisë, nga huadhënësi që nuk e ka ezuuar shumën e garancisë në favor të tij te huadhënësi që e ka ezauruar atë plotësisht.
 - (3) Në skemën e garancisë shtetërore si më lartë nuk përfshihen tregtarët ose shoqëritë tregtare, të cilët janë subjekt i përfitimit nga skema e subvencionimit të pagës.
 - (4) Autorizohet ministri i Financave dhe Ekonomisë për nënshkrimin e marrëveshjeve të garancisë me secilën nga bankat e nivelit të dytë.

Referenca:

- VKM Nr. 277, datë 06.4.2020 “Për miratimin e garancisë shtetërore të huas me bankat e nivelit të dytë për pagat e tregtarëve ose shoqërive tregtare, aktiviteti i të cilave është prekur nga vendimet e Këshillit të Ministrave, në kuadër të menaxhimit të situatës së krijuar nga Covid-19, si edhe për përcaktimin e kushteve e të kriterëve të marrëveshjes së garancisë dhe marrëveshjes së mirëkuptimit” - **Fletore Zyrtare Nr.60/2020**

Për përmbajtjen e plotë të aktit kliko [këtu](#).

IV. KUADRI LIGJOR/NËNLIGJOR DHE MASAT E TJERA

TË PËRGJITHSHME

1. LIGJI Nr.15/2016 “PËR PARANDALIMIN DHE LUFTIMIN E INFEKSIONEVE DHE SËMUNDJEVE INFEKTIVE”- Fletore Zyrtare Nr. 46/2016

- Ky ligj përcakton përgjegjësitë dhe rolin e shërbimeve shëndetësore, shërbimeve të shëndetit publik, si dhe aktorëve të tjerë të të gjitha niveleve, publike e jopublike, në marrjen e masave për parandalimin, kontrollin, trajtimin, monitorimin, sigurimin e financimit dhe ndarjen e përgjegjësiave për sëmundjet infektive dhe ngjarjet me rëndësi për shëndetin publik.
- Disa nga **parimet** kryesore për parandalimin dhe luftimin e infeksioneve dhe sëmundjeve infektive janë si më poshtë:
 - (1) parandalimi i sëmundjeve ngjitëse në territorin e Republikës së Shqipërisë është i detyrueshëm;
 - (2) parandalimi dhe luftimi i infeksioneve dhe sëmundjeve infektive ofrohet pa asnjë lloj diskriminimi;
 - (3) parandalimi dhe luftimi i infeksioneve dhe sëmundjeve infektive ofrohet në të gjithë territorin e Republikës së Shqipërisë;
 - (4) parandalimi dhe luftimi i sëmundjeve infektive me karakter epidemik, sipas listës të përgatitur nga Shërbimi Kombëtar i Inteligjencës Epidemike ofrohet falas për çdo person;
 - (5) mbrojtja nga sëmundjet infektive bëhet sipas një planifikimi, programimi, organizimi, zbatimi të masave për parandalimin, diagnozën, trajtimin, luftimin, zhdukjen e sëmundjeve infektive dhe sigurimin e mjeteve e infrastrukturës së domosdoshme për mbrojtjen shëndetësore ndaj tyre;
 - (6) çdo person ka të drejtë të përfitojë nga masat për mbrojtjen nga sëmundjet infektive;

- (7) çdo person i sëmurë nga sëmundjet infektive me karakter epidemik ka të drejtën dhe detyrimin të mjekohet falas në çdo institucion shëndetësor publik apo jopublik;
 - (8) çdo individ, çdo person fizik ose juridik dhe çdo institucion ka për detyrë që të zbatojë masat e përcaktuara dhe të urdhëruara nga organet kompetente, për mbrojtjen nga sëmundjet infektive;
 - (9) çdo përpjekje për kontrollin, eliminimin dhe zhdukjen e sëmundjeve infektive duhet të ndërpresë zinxhirin e infeksionit, duke u fokusuar në kontrollin e agjentit infektues, burimin e infeksionit, mënyrën e transmetimit dhe strehuesin përkatës.
- **Njoftimi dhe raportimi i sëmundjeve infektive** - çdo institucion publik apo jopublik raporton tek organet përkatëse, të përcaktuara nga ministri përgjegjës për shëndetësinë për:
 - (1) çdo infeksion, i cili, sipas tij, paraqet apo mund të paraqesë dëm të rëndësishëm për shëndetin e njeriut;
 - (2) çdo ngjarje jo të zakonshme apo sindroma, e cila apo të cilat, sipas tij, paraqesin apo mund të paraqesin dëm të rëndësishëm për shëndetin e njeriut;
 - (3) çdo sëmundje apo infeksion të dyshuar apo të konfirmuar në personat e vdekur;
 - (4) agjentët infektues, të cilët janë gjetur te mostrat humane të ekzaminuara prej tyre.
 - Ligji parashikon **masat e veçanta** që mund të zbatohen për parandalimin e sëmundjeve infektive. Më kryesoret janë:
 - (1) zbulimi në kohë i burimit të infeksionit dhe rrugëve të marrjes e përhapjes së tij;
 - (2) survejanca epidemiologjike dhe njoftimi i hershëm dhe i shpejtë;
 - (3) izolimi dhe karantina;
 - (4) transportimi i sigurt;
 - (5) diagnoza e saktë dhe në kohë reale mikro-biologjike;
 - (6) trajtimi dhe shërimi i personave të sëmurë;
 - (7) gjurmimi i kontakteve me persona të infektuar apo të sëmurë;
 - (8) kufizimin ose ndalimin e udhëtimeve në vendin ku është përhapur epidemia nga këto sëmundje;
 - (9) kufizimin ose ndalimin e qarkullimit në rajonet e infektuara ose të rrezikuara;
 - (10) kufizimin ose ndalimin e qarkullimit të llojeve të ndryshme të mallrave dhe produkteve;
 - (11) marrjen pjesë, në mënyrë të detyrueshme, të institucioneve shëndetësore dhe institucioneve të tjera, si dhe të qytetarëve në luftimin e sëmundjes ngjitëse, shfrytëzimin e objekteve dhe mjeteve të transportit.
 - **Strukturat përgjegjëse** për kontrollin e sëmundjeve infektive janë:
 - (1) Instituti i Shëndetit Publik

- (2) Shërbimi Kombëtar i Inteligjencës Epidemike
- (3) Shërbimi Kombëtar i Sëmundjeve Infektive

Për përmbajtjen e plotë të aktit kliko [këtu](#).

2. AKT NORMATIV Nr.2, DATË 11.3.2020 PËR DISA SHTESA DHE NDRYSHIME NË LIGJIN NR.15/2016, “PËR PARANDALIMIN DHE LUFTIMIN E INFEKSIONEVE DHE SËMUNDJEVE INFEKTIVE”- Fletore Zyrtare Nr. 34/2020

Me anë të këtij akti normativ u bënë disa shtesa dhe ndryshime në ligjin e mësipërm me anë të të cilave u parashikuan:

- (1) **vetëkarantimi si masë e veçantë shtesë** për parandalimin e sëmundjeve infektive;
- (2) **angazhohen Policia e Shtetit dhe Forcat e Armatosura**, në ndihmë të saj për të siguruar zbatimin e masave parandaluese;
- (3) **ashpërsimi i masave administrative** të zbatueshme nga ana e institucioneve përkatëse.

Për përmbajtjen e plotë të aktit kliko [këtu](#).

MASA ADMINISTRATIVE/SANKSIONE

1. AKT NORMATIV Nr. 3, DATË 15.3.2020 PËR MARRJEN E MASAVE TË VEÇANTA ADMINISTRATIVE GJATË KOHËZGJATJES SË PERIUdhËS SË INFEKSIONIT TË SHKAKTUAR NGA COVID-19 - Fletore Zyrtare Nr. 37/2020

- Ky akt normativ ka për qëllim përcaktimin dhe forcimin e zbatimit të rregullave, të vendimeve, të urdhrave dhe të udhëzimeve të nxjerra nga organet kompetente, në të gjithë territorin e Republikës së Shqipërisë, për parandalimin dhe luftimin e përhapjes së infeksionit të shkaktuar nga COVID-19. Akti normativ ka karakter të përkohshëm dhe zbatohet për aq kohë sa zgjat periudha e infeksionit të shkaktuar nga COVID-19.
- Të drejtën e dhënies së masave administrative të këtij akti normativ, e ka organi kompetent sipas fushës së përgjegjësisë dhe, në çdo rast, nga Policia e Shtetit.

- Gjobat e dhëna, sipas këtij akti normativ, përbëjnë titull ekzekutiv dhe derdhen 100% në buxhetin e shtetit.
- Masat administrative të përcaktuara nga Akti Normativ kanë përparësi ndaj dispozitave të ligjit 15/2016 lidhur me masat administrative.
- Disa nga masat administrative të parashikuara janë:
 - (1) Subjektet që eksportojnë barna dhe pajisje mjekësore nga Republika e Shqipërisë, pa autorizim të posaçëm të ministrit të Shëndetësisë dhe Mbrojtjes Sociale, për kryerjen e këtij aktiviteti, dënohen me gjobë në masën 5 000 000 (pesë milionë) lekë dhe iu sekuestrohet e gjithë sasia e barnave/pajisjeve mjekësore. Në rast përsëritjeje, masave të mësipërme iu shtohet edhe ndalimi i eksportit të barnave/pajisjeve mjekësore, deri në 6 muaj.
 - (2) Subjektet apo individët që organizojnë zhvillimin e aktiviteteve publike dhe jopublike, si aktivitete sportive, kulturore dhe konferenca, apo grumbullimet masive në vende të mbyllura apo të hapura, si koncerte, tubime dhe dëgjesa publike, dënohen me gjobë në masën 5 000 000 (pesëmilionë) lekë për organizatorët dhe ndalimin e aktivitetit.
 - (3) Dënohet me gjobë në masën 700 000 (shtatëqind mijë) lekë:
 - a) Shtetasi, i cili hyn në territorin e Republikës së Shqipërisë dhe nuk deklaron ardhjen e tij nga zonat e prekura nga infeksioni COVID-19, të deklaruara nga organet kompetente, vendase ose të huaja apo ndërkombëtare;
 - b) Shtetasi, i cili hyn nga zonat e prekura në territorin e Republikës së Shqipërisë, që nuk vetëkarantinohet për një periudhë 14-ditore në ambientet e banesës së tij, si një masë parandaluese për mospërhapjen e infeksionit të shkaktuar nga COVID-19;
 - c) Shtetasi, i cili vjen nga zonat e prekura dhe nuk zbaton urdhrin e dhënë nga organet kompetente për vetëkarantinimin e detyrueshëm;
 - d) Shtetasi, i cili ka rezultuar pozitiv dhe nuk zbaton urdhrin e dhënë nga organet kompetente për vetëkarantinimin e detyrueshëm.
 - (4) Institucionet arsimore, çerdhet dhe kopshtet, publike dhe jopublike, që nuk mbyllin aktivitetin e tyre për periudhën e përcaktuar nga autoritetet kompetente, dënohen me gjobë në masën 5 000 000 (pesë milionë) lekë për institucionet arsimore, publike/jopublike, dhe në masën 1 000 000 (një milion) lekë për çerdhet dhe kopshtet, publike/jopublike. Në rast përsëritjeje iu shtohet edhe mbyllja e veprimtarisë për një periudhë 6-mujore.

- (5) Subjektet apo individët, publikë apo privatë, që zhvillojnë aktivitete në ambjentet e mbyllura të argëtimit për fëmijë e të rinj, palestrat, qendrat sportive, pishinat, qendrat e internetit, qendrat kulturore, që nuk zbatojnë urdhrin e organit kompetent për mbylljen e tyre, dënohen me gjobë në masën 1 000 000 (një milion) lekë, dhe në rast përsëritjeje iu shtohet edhe mbyllja e veprimtarisë për një periudhë 6-mujore.
- (6) Subjektet apo individët, të cilët nuk zbatojnë urdhrat e dhëna nga organet kompetente për mosmbylljen e bareve, lokaleve, restoranteve dhe klubeve, dënohen me gjobë në masën 1 000 000 (një milion) lekë dhe në rast përsëritjeje iu shtohet edhe mbyllja e aktivitetit për një periudhë 6-mujore.
- (7) Drejtuesit e automjeteve, të cilët nuk zbatojnë ndalimin e qarkullimit të mjeteve të transportit, publik dhe privat, përfshirë automjetet private, në zonat dhe oraret e përcaktuara nga organet kompetente, dënohen me heqje të lejes së drejtimit për një periudhë trevjeçare dhe me bllokim të mjetit. Nga ky rregull përjashtohen personat e autorizuar nga organet kompetente.
- (8) Rritja e çmimit të shitjes të të gjitha mallrave dhe produkteve ushqimore, barnave, pajisjeve mjekësore dhe shërbimeve, në krahasim me çmimin e tyre në shitje të rregullt, të tregtuar në muajt paraardhës nga data e hyrjes në fuqi të këtij akti normativ, dhe për produktet sezonale, sipas çmimit të tregtuar në të njëjtën periudhë kohore në vitin paraardhës nga data e hyrjes në fuqi të këtij akti normativ, kur nuk vjen si pasojë e rritjes së çmimit nga importi i tyre, dënohet me gjobë në masën 5 000 000 (pesë milionë) lekë për tregtuesit me shumicë dhe 100 000 (njëqind mijë) lekë për tregtuesit me pakicë. Në rast përsëritjeje iu shtohet edhe mbyllja e veprimtarisë për një periudhë 6-mujore.
- (9) Mos-ofrimi i shërbimeve nga farmacitë, tregtuesit me shumicë të barnave dhe prodhuesit e barnave, duke zbatuar kriteret e sigorisë të përcaktuara nga organet kompetente, dënohet me gjobë në masën 10 000 000 (dhjetë milionë) lekë për tregtuesit me shumicë dhe në masën 50 000 (pesëdhjetë mijë) lekë për tregtuesit me pakicë. Në rast përsëritjeje me bllokimin e të gjithë sasisë së mallit dhe mbylljen e veprimtarisë për një periudhë tre vjeçare.
- (10) Mos-ofrimi i shërbimeve nga subjektet/individët që tregtojnë produkte ushqimore, me shumicë apo pakicë, duke zbatuar kriteret e sigorisë të përcaktuara

nga organet kompetente, dënohet me gjobë në masën 10 000 000 (dhjetë milionë) lekë për tregtuesit me shumicë dhe në masën 50 000 (pesëdhjetë mijë) lekë për tregtuesit me pakicë. Në rast përsëritjeje me bllokimin e të gjithë sasisë së mallit dhe mbylljen e veprimtarisë për një periudhë trevjeçare.

Për përmbajtjen e plotë të aktit kliko [këtu](#).

2. AKT NORMATIV Nr.4, DATË 16.3.2020 PËR DISA SHTESA NË AKTIN NORMATIV NR.3, DATË 15.3.2020, TË KËSHILLIT TË MINISTRAVE, “PËR MARRJEN E MASAVE TË VEÇANTA ADMINISTRATIVE GJATË KOHËZGJATJES SË PERIUDHËS SË INFEKSIONIT TË SHKAKTUAR NGA COVID-19”- Fletore Zyrtare Nr. 38/2020

- Me anë të këtij akti normativ u vendosën masa administrative shtesë ndaj atyre të vendosura në Aktin Normativ nr.3 dhe konkretisht:
 - (1) Individët, të cilët nuk zbatojnë urdhrin e dhënë nga organet kompetente për ndalimin e lëvizjes për këmbësorët sipas orareve të përcaktuara, dënohen me gjobë në masën 10 000 (dhjetëmijë) lekë dhe me bllokim 3 muaj të automjetit privat, nëse e disponon një të tillë.
 - (2) Individët, të cilët nuk zbatojnë urdhrin e dhënë nga organet kompetente për kufizimin e lëvizjeve në parqe dhe zona të gjelbërta të hapura, në zonat urbane, apo mjedise të tjera publike të hapura, dënohen me gjobë në masën 20 000 (njëzet mijë) lekë dhe me bllokim 3 muaj të automjetit privat, nëse e disponon një të tillë.
 - (3) Për individët, të cilët, në kushtet e shkeljeve të mësipërme lëvizin me biçikletë, ciklomotor ose motomjet, zbatohet edhe masa shoqëruese e bllokimit të mjetit lëvizës për 3 muaj.

Për përmbajtjen e plotë të aktit kliko [këtu](#).

3. AKTI NORMATIV Nr.8, DATË 24.3.2020 PËR DISA SHTESA NË AKTIN NORMATIV NR.3, DATË 15.3.2020, TË KËSHILLIT TË MINISTRAVE, “PËR MARRJEN E MASAVE TË VEÇANTA ADMINISTRATIVE GJATË KOHËZGJATJES SË PERIUDHËS SË

INFEKSIONIT TË SHKAKTUAR NGA COVID-19” - Fletore Zyrtare Nr. 48/2020

- o Me anë të këtij akti normativ u vendosën masa administrative të tjera shitesë ndaj atyre të vendosura në Aktin Normativ nr.3 dhe Aktin Normativ nr.4. Më kryesoret janë:
 - (1) **Të gjitha subjektet që tregtojnë produkte ushqimore dhe produkte të tjera**, me shumicë, të domosdoshme për përballimin e situatës së epidemisë, janë të detyruar të marrin masa për mbajtjen e rezervave që tregtojnë për një periudhë 3-mujore ose në përputhje me jetëgjatësinë e produktit, me qëllim përballimin e situatës së shkaktuar nga infeksioni COVID-19.
 - (2) **Të gjitha subjektet që tregtojnë me shumicë barna/pajisje mjekësore**, subjekte që prodhojnë barna dhe pajisje mjekësore dhe subjektet që ofrojnë shërbime shëndetësore, të jenë në gadishmëri dhe të marrin të gjitha masat e nevojshme për të siguruar furnizime me barna dhe pajisje mjekësore dhe për të ofruar shërbime shëndetësore të nevojshme, në kuadër të përballimit të situatës së emergjencës së shkaktuar nga COVID-19.
 - (3) Mosmarrja e masave si më sipër nga ana e subjekteve dënohet me:
 - i. gjobë në masën 5 000 000 (pesë milionë) lekë dhe
 - ii. me përjashtimin nga procedurat e prokurimit publik për një periudhë 3-vjeçare nga Agjencia e Prokurimit Publik

Për përmbajtjen e plotë të aktit kliko [këtu](#).

TREGTIA NË KUADRIN E CEFTA-s

VKM NR. 269, DATË 1.4.2020 “PËR MIRATIMIN E PROPOZIMIT TË PËRBASHKËT TË PËRGATITUR NGA SEKRETARIATI I PËRHERSHËM I KOMUNITETIT TË TRANSPORTIT DHE SEKRETARIATI I CEFTA-S, PËR TË LEHTËSUAR TRANSPORTIN DHE TREGTIMIN E MALLRAVE TË NEVOJËS SË PARË BRENDË BALLKANIT PERËNDIMOR”- Fletore Zyrtare Nr.56/2020

- Me VKM Nr. 269 datë 01.04.2020 është miratuar propozimi i përbashkët i përgatitur nga Sekretariati i Përhershëm i Komunitetit të Transportit dhe Sekretariati i CEFTA-s, për të lehtësuar transportin dhe tregtimin e mallrave të nevojës së parë brenda Ballkanit Perëndimor.
- Propozimi bazohet në dy shtylla dhe dy faza:
 - (5) identifikimi i një numri të kufizuar të pikave të kalimit kufitar dhe ato të përbashkëta prioritare rrugore dhe porte kryesore që duhet të vazhdojnë të funksionojnë në të gjitha rrethanat. Për të gjitha këto pika lidhëse, një seri masash është propozuar për të lehtësuar punën/bashkëpunimin midis administratave të ndryshme të përfshira. Ai gjithashtu identifikon një seri të "akseve të gjelbra" që lidhin gjashtë vendet e Ballkanit Perëndimor së bashku në të cilat duhet të lejohet qarkullimi i lirë i trafikut, së bashku me një numër të kufizuar të pikave të karburantit, të cilat mund të mbeten të hapura edhe në rast të një kontaminimi të mundshëm të popullatës. Kjo pikë është thelbësore për të siguruar që drejtuesit e kamionëve/kamionët mund të vazhdojnë të funksionojnë pavarësisht kësaj situatë të degraduar.
 - (6) zbatimi i Linjave të Gjelbra nën Udhëzimet për masat e menaxhimit të kufijve për mbrojtjen e shëndetit dhe sigurimin e disponueshmërisë së mallrave dhe shërbimeve thelbësore.

Për përmbajtjen e plotë të aktit kliko [këtu](#).

VEPRIMTARITË GJYQËSORE

AKT NORMATIV Nr.9, DATË 25.3.2020 “PËR MARRJEN E MASAVE TË VEÇANTA NË FUSHËN E VEPRIMTARISË GJYQËSORE, GJATË KOHËZGJATJES SË GJENDJES SË EPIDEMISË SË SHKAKTUAR NGA COVID-19” - Fletore Zyrtare Nr.50/2020

- Seancat gjyqësore në çështjet administrative, civile dhe penale, të planifikuara pranë të gjitha gjykatave, shtyhen deri në përfundimin e gjendjes së epidemisë së shkaktuar nga përhapja e COVID-19.
- Gjatë periudhës së COVID-19, pezullohen afatet për ngritjen e padive, për paraqitjen e ankimeve si dhe për kryerjen e çdo veprimi procedural në çështjet administrative, civile dhe

penale. Kur afatet fillojnë gjatë periudhës së pezullimit, ato shtyhen deri në përfundimin e gjendjes së epidemisë.

- Përfshihen nga rregullat e mësipërme në lidhje me pezullimin, shqyrtimi i çështjeve gjyqësore të mëposhtme:

Çështjet administrative, me objekt gjykimin e masave të sigurimit të padisë, në rast se gjykata vlerëson se shqyrtimi më vonë mund të shkaktojë një dëm të rëndë e të pariparueshëm për palët; Çështjet familjare, me objekt gjykimin kujdesin, detyrimet dhe respektimin e të drejtave të të miturve, kujdestarinë dhe birësimin, masat mbrojtëse ndaj dhunës në familje, ushtrimin e përgjegjësisë prindërore, përkujdesjen dhe detyrimet për ushqim, etj.

Çështjet penale që lidhen me vleftësimin e arrestit në flagrancë ose ndalimit dhe disa raste të tjera urgjente.

- Masat organizative specifike për zhvillimin e proceseve gjyqësore, kanë të bëjnë me:
 - (1) kufizimin e hyrjes së publikut në ambientet e gjykatës;
 - (2) rregullimin e aksesit në shërbime, me rezervim, edhe nëpërmjet komunikimit telefonik ose elektronik;
 - (3) vendosjen e udhëzuesve detyrues për kufizimin dhe mënyrën e lëvizjes së personave;
 - (4) zhvillimin me dyer të mbyllura të të gjitha seancave gjyqësore publike për çështjet e përcaktuara;
 - (5) kryerjen e seancave mbi bazë dokumentesh në çështjet administrative dhe civile, në të cilat nuk kërkohet prania e palëve, nëpërmjet përdorimit të mjeteve të komunikimit elektronik për paraqitjen e akteve procedurale dhe dhënien e vendimit nga gjykata.

Për përmbajtjen e plotë të aktit kliko [këtu](#).

VEPRIMTARITË PËRMBARIMORE, TË NDËRMJETËSIMIT DHE FALIMENTIMIT

AKT NORMATIV NR. 13, DATË 2.4.2020 “PËR MARRJEN E MASAVE TË VEÇANTA NË FUSHËN E VEPRIMTARISË SË SHËRBITIT PËRMBARIMOR GJYQËSOR, NDËRMJETËSIMIT DHE ADMINISTRIMIT TË PROCEDURAVE TË FALIMENTIMIT GJATË KOHËZGJATJES SË GJENDJES SË

EPIDEMISË SË SHKAKTUAR NGA COVID-19” - Fletore Zyrtare Nr.57/2020

- Nga data 02.04.2020 deri në përfundimin e gjendjes së epidemisë së shkaktuar nga përhapja e COVID-19 pezullohen afatet për kryerjen e veprimeve procedurale të përmbaruesit gjyqësor shtetëror apo privat, ndërmjetësit dhe administratorit në procedurat e falimentimit. Kur afatet për kryerjen e veprimeve procedurale fillojnë gjatë periudhës së pezullimit, ato shtyhen deri në përfundimin e gjendjes së epidemisë.
- Pezullimi i afateve procedurale nuk është i zbatueshëm për ekzekutimin e titujve ekzekutivë me objekt:
 - (a) çështje familjare, me objekt kujdesin, detyrimet dhe respektimin e të drejtave të të miturve, kujdestarinë, birësimin, ushtrimin e përgjegjësisë prindërore, përkujdesjen dhe detyrimet për ushqim;
 - (b) urdhrat e mbrojtjes dhe urdhrat e menjëhershëm të mbrojtjes;
 - (c) masat e sigurimit të padisë për çështje administrative dhe për çështjet civile, në të cilat gjykata ka dhënë vendim për sigurimin e padisë ose vendim me ekzekutim të përkohshëm, kur nga vonesa e ekzekutimit ose e kryerjes së veprimeve procedurale bëhet i pamundur ekzekutimi i këtyre titujve ekzekutivë, pas përfundimit të gjendjes së epidemisë.
 - (ç) nëse është e domosdoshme shmangia e dëmtimit të masës së falimentimit;
 - (d) për ndërmjetësimin për zgjidhjen e mosmarrëveshjeve në fushën penale, kur gjatë hetimit vlerësohet si e nevojshme për mbrojtjen e interesave të të miturit.

Për përmbajtjen e plotë të aktit kliko [këtu](#).

KONTRATAT E PASTRIMIT DHE TRANSPORTIT PUBLIK

AKT NORMATIV Nr. 5, DATË 17.3.2020 PËR NJË SHITESË NË AKTIN NORMATIV NR.3, DATË 15.3.2020, TË KËSHILLIT TË MINISTRAVE, “PËR MARRJEN E MASAVE TË VEÇANTA ADMINISTRATIVE GJATË KOHËZGJATJES SË PERIUDHËS SË INFEKSIONIT TË SHKAKTUAR NGA COVID-19”, TË NDRYSHUAR- Fletore Zyrtare Nr. 40/2020

- Me anë të këtij akti normativ u parashikua mundësia për njësitë e vetëqeverisjes vendore që të amendojnë kontratat e pastrimit dhe transportit publik gjatë kohëzgjatjes së periudhës së infeksionit të shkaktuar nga COVID-19. Konkretisht në këtë Akt Normativ parashikohet se: *Njësitë e vetëqeverisjes vendore, në kuadër të marrjes së masave gjatë kohëzgjatjes së periudhës së infeksionit të shkaktuar nga COVID-19, me pëlqimin e operatorëve ekonomikë, mund të bëjnë amendime të kontratave që kanë me operatorët e pastrimit dhe operatorët e transportit publik për ofrimin e këtyre shërbimeve, sipas nevojave të diktuar nga situata emergjente. Kontrata hyn në fuqi pas miratimit nga këshilli bashkiak përkatës. Kontrata nënshtrohet nga titullari i autoritetit kontraktor. Shpenzimet do të përballohen nga buxheti i njësisë të vetëqeverisjes vendore.*

Për përmbajtjen e plotë të aktit kliko [këtu](#)

KOHËZGJATJA E PUNËS NË INSTITUCIONET SHTETËRORE

VENDIM Nr.237, DATË 20.3.2020 PËR NJË SHITESË NË VENDIMIN NR.511, DATË 24.10.2002, TË KËSHILLIT TË MINISTRAVE, “PËR KOHËZGJATJEN E PUNËS DHE TË PUSHIMIT NË INSTITUCIONET SHTETËRORE”, TË NDRYSHUAR- Fletore Zyrtare Nr. 44/2020

- Me anë të kësaj VKM u përcaktua orari i punës për nëpunësit civilë dhe punonjësit e tjerë të administratës publike/shtetërore nga ora 08:00 deri në 13:00, për të gjithë periudhën e gjendjes së epidemisë së shkaktuar nga COVID-19.
- Nëpunësit civilë dhe punonjësit e përmendur VKM Nr.237, ngarkohen të kryejnë çdo detyrë funksionale që iu ngarkohet nga eprori i drejtpërdrejtë apo titullari i institucionit, e cila mund të përmbushet në kushtet e banesës, nëpërmjet komunikimit telefonik apo të mënyrave të tjera të komunikimit elektronik.

Për përmbajtjen e plotë të aktit kliko [këtu](#).

ORARET E LËVIZJES DHE KUFIZIME TË TJERA

1. URDHËR Nr. 193, DATË 20.3.2020 “PËR MBYLLJEN APO KUFIZIMIN E LËVIZJEVE NË REPUBLIKËN E SHQIPËRISË” - Fletore Zyrtare Nr. 34/2020 (NDRYSHUAR ME URDHWRIN NR.256 DATË 10.04.2020)

Me anë të këtij urdhëri të nxjerrë nga Ministri i Shëndetësisë dhe Mbrojtjes Sociale është vendosur:

- Të lejohen të kryejnë aktivitetin e tyre vetëm në fashën orare 05:00-17:30, duke filluar nga dita e hënë datë 13.04.2020, pikat e shitjes së produkteve ushqimore me pakicë dhe shumicë, pikat e tregëtisë së barnave, produkteve mjekësore dhe institucioneve financiare.
- Kufizimi i lëvizjes në të gjitha qendrat urbane, për të gjitha kategoritë (këmbësor, biçikleta, çiklomotor, motomjete dhe mjete), si edhe ndalimi i ofrimit të shërbimeve për qytetarët nga aktivitetet e lejuara, çdo fundjavë duke filluar nga e premtdja ora 17:30 deri të hënë në orën 05:00. Përfshihen nga ky rregull të gjitha mjetet e transportit të mallrave dhe produkteve ushqimore, Policia e Shtetit, Forcat e Armatosura, njësitë kritike të shërbimeve shtetërore dhe atyre të kompanive mediatike si edhe shërbimet në banesë (delivery)
- Të ndalohet ofrimi i shërbimit ndaj qytetarëve nga të gjitha aktivitetet përfshirë ato të përcaktuara më lartë si edhe të përcaktuara në Tabelën 1 duke filluar nga e premtdja datë 17.04.2020 e në vijim nga ora 17:30 deri të hënë në orën 05:00.
- Punonjësit e institucioneve financiare, të linjave prodhuese dhe ushqimore dhe të gjitha aktivitetet e lejuara, sipas Tabelës 1, do të lejohen të qarkullojnë vetëm në itinerarin shtëpi-punë.

Për përmbajtjen e plotë të aktit fillestar kliko [këtu](#).

Për përmbajtjen e plotë të aktit ndryshues kliko [këtu](#).

2. URDHËR Nr. 131, DATË 8.3.2020 “PËR NDALIMIN E EKSPORTIT TË BARNAVE DHE TË PAJISJEVE MJEKËSORE” - Fletore Zyrtare Nr. 34/2020

- Me anë të këtij urdhëri të nxjerrë nga Ministri i Shëndetësisë dhe Mbrojtjes Sociale është vendosur:

- (1) Ndalimi i eksportit të barnave dhe të pajisjeve mjekësore nga Republika e Shqipërisë deri në një urdhër të dytë.
- (2) Eksporti i barnave dhe i pajisjeve mjekësore do të kryhet vetëm me autorizim të posaçëm të Ministrit të Shëndetësisë dhe Mbrojtjes Sociale.

Për përmbajtjen e plotë të aktit kliko [këtu](#).

3. URDHËR NR.156, DATË 10.03.2020 PËR MARRJEN E MASAVE TË VEÇANTA NË PARANDALIMIN E PËRHAPJES SË INFEKSIONIT TË SHKAKTUAR NGA COVID-19 (NDRYSHUAR ME URDHËRIN NR.223 DATË 01.04.2020)

- o Me anë të këtij urdhëri të nxjerrë nga Ministri i Shëndetësisë dhe Mbrojtjes Sociale është vendosur midis të tjerave:
 - (1) **Mbyllja për publikun deri në përfundim të gjendjes së epidemisë së shkaktuar nga infeksioni COVID-2019 të:**
 - a) Ambjenteve që ofrojnë shërbime në lokale nate
 - b) Ambjenteve të mbyllura të dedikuara për argëtimin e fëmijëve dhe të rinjtë, aktiviteteve në palestra, qendra sportive, pishina, qendra internet, qendra kulturore dhe argëtimi
 - (2) **Ndalimi deri në përfundim të gjendjes së epidemisë së shkaktuar nga infeksioni COVID-2019:**
 - a) Aktiviteteve sportive, sociale dhe kulturore;
 - b) Ekskursioneve mësimore të organizuara prej institucioneve shkollore me destinacion brenda ose jashtë vendit;
 - c) Procedurave të konkursit për punësim personeli, konkurse shkollimi dhe specializimi.
 - (3) **Institucionet publike dhe private, të hartojnë sipas fushës së përgjegjësisë së tyre brenda datës 11.03.2020 një plan masash për sigurimin e ofrimit të shërbimeve prioritare, duke prioritetizuar kategoritë e shërbimit kryesisht nëpërmjet ofrimit të shërbimit online, punës në distancë, dhe vetëm në raste të domosdoshme të ofrojnë shërbimin ndërmjet kontaktit fizik. Për shërbimet për të cilat nevojitet kontakti i drejtpërdrejtë me publikun institucionet duhet të pajisin personelin me mjete pune mbrojtëse me qëllim ruajtjen e shëndetit të tyre.**

Për përmbajtjen e plotë të aktit fillestar kliko [këtu](#).

Për përmbajtjen e plotë të aktit ndryshues kliko [këtu](#).

4. URDHËR NR.164, DATË 12.03.2020 PËR MBYLLJEN E BAREVE, RESTORANTEVE, LOKALEVE, FAST FOOD DHE KUFIZIMIN E SHËRBIMEVE QË OFROHEN NGA STRUKTURAT AKOMODUESE QË OFROJNË SHËRBIM PËR KLIENTËT (NDRYSHUAR ME URDHËRIN Nr.217, datë 1.4.2020)

- Me anë të këtij urdhëri të nxjerrë nga Ministri i Shëndetësisë dhe Mbrojtjes Sociale janë vendosur disa detyrime për bizneset në fushën e shërbimeve dhe strukturave akomoduese. Detyrimet kryesore të parashikuara janë:

(1) Mbyllja e bareve, restoranteve, fast food, lokaleve që ofrojnë shërbim për klientët, në të gjithë vendin deri në përfundim të gjendjes së epidemisë së shkaktuar nga infeksioni COVID-2019. Përfundim nga ky rregull bëhet vetëm për shërbimin në banesë (delivery);

Për përmbajtjen e plotë të aktit fillestar kliko [këtu](#).

Për përmbajtjen e plotë të aktit ndryshues kliko [këtu](#).

V. VENDIME DHE NJOFTIME TË TJERA TË RËNDËSISHME NGA ORGANET MBIKËQYRËSE DHE RREGULLATORE

1. VENDIMMARRJA E KËSHILLIT MBIKËQYRËS I DATËS 12 MARS 2020

Vendimi u krijon lehtësi bankave dhe subjekteve financiare jobanka, si dhe shoqërive të kursim-kreditit dhe unioneve të tyre për periudhën mars – maj 2020, që në rastet kur evidentohen paaftësi paguese të kredimmarrësve të mos jenë subjekt i zbatimit të kërkesave të këtyre rregulloreve që lidhen kryesisht me klasifikimin dhe krijimin e fondeve për provigjione.

Në mbështetje të ekonomisë shqiptare në kushtet e situatës së krijuar në vend nga përhapja e infeksionit të shkaktuar nga virusi COVID-19, Këshilli Mbikëqyrës i Bankës së Shqipërisë vendosi:

- (1) Miratimin e një ndryshimi në rregulloren “Për administrimin e rrezikut të kredisë nga bankat dhe degët e bankave të huaja”
- (2) Miratimin e një ndryshimi në rregulloren “Për administrimin e rrezikut në veprimtarinë e subjekteve financiare jobanka”
- (3) Miratimin e një ndryshimi në rregulloren “Për administrimin e rrezikut në veprimtarinë e shoqërive të kursim-kreditit dhe të unioneve të tyre”

Për përmbajtjen e plotë të aktit kliko [këtu](#).

2. VENDIMMARRJA E KËSHILLIT MBIKËQYRËS E DATËS 12 MARS 2020- MASA SHITESË NË KUADËR TË COVID-19

- Këshilli Mbikëqyrës i BSh në mbledhjen e datës 8 Prill 2020 mori këto vendime:

- (1) uljen me 50% të honorareve të anëtarëve të Këshillit Mbikëqyrës dhe pagave të Administratorëve e Drejtorëve të Bankës së Shqipërisë, për periudhën e zgjatjes së epidemisë së koronavirusit, në shenjë solidariteti me qytetarët dhe bizneset e prekura.
 - (2) pezullohet deri në fund të muajit qershor 2020, shpërndarja nga ana e bankave, të fitimit të mbartur nga periudhat e mëparshme, të fitimit të realizuar në vitin 2019 si dhe të fitimit që do të realizohet përgjatë gjashtëmujorit të parë të vitit 2020.
 - (3) duke filluar nga data 10 prill 2020, heqjen e komisioneve të aplikuara nga bankat për transfertat e kreditit në lekë formë jo letër nga klientët e tyre, si dhe të tarifave për pjesëmarrësit në sistemet e pagesave AIPS dhe AECH të operuara nga Banka e Shqipërisë. Ky vendim ka për qëllim mbështetjen e klientëve të bankave për vijimin e kryerjes së pagesave të tyre në kushtet e kufizimit të lëvizjes dhe gjithashtu minimizimit të rreziqeve nga grumbullimi i popullatës në degët e bankave. Ky vendim synon të bëjë më tërheqës përdorimin e shërbimeve Homebanking nëpërmjet eliminimit të kostove të këtij shërbimi.
- Vendimi “Për trajtimin e përkohshëm financiar mujor të anëtarëve të Këshillit Mbikëqyrës, Administratorëve dhe drejtorëve të Bankës së Shqipërisë, gjatë periudhës së gjendjes së epidemisë së shkaktuar nga COVID-19”.
 - Vendimi “Për pezullimin e shpërndarjes së fitimit nga bankat”.
 - Vendimi “Për heqjen e komisioneve të aplikuara nga bankat për transfertat e kreditit në lekë formë jo letër nga klientët e tyre, si dhe të tarifave për pjesëmarrësit në sistemet e pagesave AIPS dhe AECH të operuara nga Banka e Shqipërisë”.

Njoftimi i Bankës së Shqipërisë, [këtu](#).

3. URDHËR I PËRBASHKËT DATË 17.03.2020 I KRYEMINISTRIT DHE GUVERNATORIT TË BANKËS SË SHQIPËRISË PER SHTYRJEN ME 3 MUAJ TË AFATIT TË PAGIMIT TË KËSTEVE TË KREDIVE

- (1) Shtyhet afati i pagimit të kësteve të kredive për biznese dhe individë deri në datën 31.05.2020, për të gjithë ata kredimarrës, të cilët janë përballur më vështirësi në këtë periudhë si pasojë e COVID-19;

- (2) Kredimarrësit duhet të komunikojnë me kredidhënësit (banka, institucione financiare jo-banka apo me shoqëritë e kursim-kredive) duke u argumentuar këtyre të fundit arsyet mbi nevojat e tyre për shtyrje të pagimit të kësteve.
- (1) Institucionet e kreditimit do të bëjnë procesimin e çdo kërkesë të paraqitur pranë tyre brenda 3 ditëve nga data e marrjes së kërkesës.

4. NJOFTIM I MINISTRISË SË FINANCAVE DHE EKONOMISË PËR DENONCIMIN E PRAKTIKAVE ABUZIVE NGA TREGËTARËT

- o Ministria e Financave dhe Ekonomisë, në kuadër të masave të marra nga qeveria për parandalimin e përhapjes së Covid-19, si dhe në kushtet e ndalimqarkullimit, përmes strukturave të saj po monitoron sjelljen e tregjeve për të shmangur çdo abuzim të mundshëm nga tregtarët. Për këtë qëllim është në dispozicion edhe numri i gjelbër pa pagesë 0800 14 14, ku të gjithë mund të bëjnë denoncime të rasteve që konstatojnë. Ministria e Financave dhe Ekonomisë inkurajon qytetarët që të përdorin këtë mjet komunikimi, për të ndihmuar në evidentimin e rasteve, të cilat do të ndiqen me prioritet, bazuar kjo edhe në ligjin “Për mbrojtjen e konsumatorit” i cili përcakton ndalimin e praktikave të padrejta tregtare, me qëllim mbrojtjen e konsumatorit. Shkeljet e dispozitave të këtij ligji, nuk përbëjnë vepër penale, por kundërvajtje administrative dhe ndëshkohen me penalitetet përkatëse në fuqi.

Për përmbajtjen e plotë të njoftimit kliko [këtu](#).

5. NJOFTIME TË DREJTORISË SË PËRGJITHSHME TË TATIMEVE

- (1) Informacion mbi mundësinë e pagesës së detyrimeve tatimore nëpërmjet portalit e-albania si dhe online-banking në bankat e nivelit të dytë;
- (2) Mbi procedurën që duhet ndjekur për autorizimin e qarkullimit të punonjësve të kompanive dhe sipërmarrjeve të prodhimit;
- (3) Lista e aktiviteteve që do të lejohen të ushtrojnë aktivitetin e tyre dhe aktivitetet të cilat do të ndalohen të ushtrojnë aktivitetin ekonomik duke filluar nga data 24 Mars 2020.

Për përmbajtjen e plotë të njoftimeve klikoni lidhjet e mëposhtme:

- <https://www.tatime.gov.al/d/8/45/45/1278/njoftim-pr-qarkullimin-e-punonjsve-t-kompanive-dhe-siprmarrjeve-t-shrbimit-q-jan-t-lejuara-t-ushtrojne-aktivitetin>
- <https://www.tatime.gov.al/d/8/45/45/1282/lista-e-aktiviteteve-qe-do-te-lejohen-te-ushtrojne-aktivitetin-e-tyre-dhe-aktivitetet-te-cilat-do-te-ndalohen-te-ushtrojne-aktivitetin-ekonomik-duke-filluar-nga-data-24-mars-2020>

6. NJOFTIM I MINISTRISË PËR EVROPËN DHE PUNËT E JASHTME LIDHUR ME AFATIN E QËNDRIMIT TË SHTETASVE SHQIPTARË NË ITALI DHE DHE REPUBLIKËN ÇEKE

- Duke nisur nga data 2 mars 2020, është vendosur një pezullim 30 ditor i afateve për procedimet administrative lidhur me qëndrimin e shtetasve të huaj, në territorin italian. Pezullimi, vlen si për procedurat e lidhura me lejet e qëndrimit (aplikim i parë ose rinovim), ashtu edhe për vizat. Për këtë arsye, bën me dije MEPJ, nuk do u jepet masa e përjashtimit nga territori italian qytetarëve të huaj, të cilët do të gjendeshin në situatë parregullsie, të shkaktuar nga pezullimi i korridoreve të transportit të qytetarëve me Republikën e Italisë. Gjithashtu, sa i përket qëndrimit të qytetarëve shqiptarë në Republikën Çeke, MEPJ informon se të gjithë shtetasit e huaj, të cilët në momentin e shpalljes së gjendjes së jashtëzakonshme, ndodheshin në mënyrë legale në territorin çek, do të mund të vazhdojnë të qëndrojnë në këtë territor gjatë kohëzgjatjes së gjendjes së jashtëzakonshme, pa pasur nevojë të zgjidhin çështjet e statusit të qëndrimit të tyre.

Për përmbajtjen e plotë të njoftimit kliko [këtu](#).

7. NJOFTIM I MINISTRISË SË INFRASTRUKTURËS DHE ENERGJISË

- Me anë të këtij njoftimi bëhet me dije se kompanitë e transportit ndërkombëtar të mallrave të dorëzojnë emrat e drejtuesve të automjeteve. Në kuadër të organizmit të transportit ndërkombëtar të mallrave, si pasojë e masave të marra për parandalimin e përhapjes së virusit COVID-19, kërkohet nga të gjitha kompanitë të cilat kryejnë transport ndërkombëtar të mallrave që brenda ditës së sotme, 14.03.2020, ora 23:00 të dorëzojnë në adresën e email transporti@infrastruktura.gov.al, listën e drejtuesve të automjeteve, të cilët kryejnë transport ndërkombëtar”, thuhet në një njoftim të shpërndarë sot nga Ministria e Infrastrukturës

dhe Energjisë. Kjo listë duhet të përmbajë emër, atësi, mbiemër, ditëlindje, numër pasaporte dhe numrin e lejes së drejtimit ndërkombëtare. Nga ana e autoriteteve do të lejohen të qarkullojnë vetëm kompanitë të cilat do të dërgojnë emrat e drejtuesve të tyre.

Për përmbajtjen e plotë të njoftimit kliko [këtu](#).

8. NJOFTIM I MINISTRISË SË BRENDSHME PËR PEZULLIMIN E APLIKIMEVE PËR DOKUMENTE BIOMETRIKE DHE PRITJA E QYTETARËVE NË ZYRAT E SHËRBIMIT PËRJASHTO KALLËZIMET NË POLICI

Në kuadër të masave për parandalimin e përhapjes së COVID-19:

- (1) Ndalohen të gjitha pritjet e qytetarëve në sportelet e shërbimeve në të gjitha institucionet e sistemit të Ministrisë së Brendshme, deri në një njoftim të dytë. Telefono MB – 0694134779
- (2) Përfshihen nga ky ndalim vetëm rastet e kallëzimeve që qytetarët bëjnë pranë strukturave të Policisë së Shtetit. Sugjerohet edhe në këto raste kallëzimet të bëhen me shkrim. Telefono 112 ose denonco në Komisaratin Dixhital!
- (3) Pezullohet aplikimi i qytetarëve për karta identiteti dhe pasaporta deri në datë 03.04.2020.
- (4) Të gjithë aplikimet, kërkesat apo ankesat e qytetarëve do të pranohen vetëm në rrugë elektronike në adresat e institucioneve përkatëse.

Për përmbajtjen e plotë të njoftimit kliko [këtu](#).


9. NJOFTIM I POLICISË SË SHTETIT NË LIDHJE ME VETËDEKLARIMIN E LËVIZJES ME MJET- "COVID-19" - VETËDEKLARO LËVIZJEN ME MJET

- Përmes këtij vetëdeklarimi online, autorizoheni për të lëvizur për punë (vajtje-ardhje) me automjetin tuaj, për rastet kur nuk ka transport nga firma ku punoni, duke respektuar oraret: 06:00-08:00 dhe 16:00-17:00. Për mjetet 4+1, lejohen deri në 3 persona në mjet, ku personat duhet të pajisen me masat mbrojtëse të nevojshme (maska, doreza, dezinfektant), mjeti të dezinfektohet vazhdimisht, dritaret e mjetit të qëndrojnë pakëz hapur për të lejuar qarkullimin e

ajrit! Për motomjetet, lejohet vetëm 1-person i cili duhet të jetë i pajisur me kaskë dhe maskë mbrojtëse! Shënim: Për lejimin e qarkullimit përtej orareve të sipërcituara, duhet autorizim i veçantë nga organet e Policisë së Shtetit.

Për përmbajtjen e plotë të njoftimit kliko [këtu](#).

Kjo përmbledhje përmban informacion të përgjithshëm të marrë nga ligje, akte nën-ligjore apo dokumenta të tjera pjesë e domain-it publik. Informacioni i përfshirë në këtë përmbledhje nuk është shterues dhe nuk zëvendëson asistencën apo këshillimin profesional që mund t'ju dubet ju apo institucioneve përkatëse. Asnjë pjesë e këtyre faqeve, qoftë tekst apo imazh nuk mund të përdoret për ndonjë qëllim tjetër përveç atij të përcaktuar. Këshilli i Investimeve është një platformë e ngritur nga autoritetet shqiptare me mbështetjen e BERZH-it për të rritur dialogun midis qeverisë dhe sektorit privat, për të përmirësuar klimën e biznesit dhe për të nxitur qeverisjen e mirë. Puna e Këshillit mbështetet nga Sekretariati, një organ i pavarur me profesionistë të përzgjedhur dhe kontraktuar nga BERZH për t'u angazhuar drejtpërsëdrejti me komunitetin e biznesit. Financimi aktual për Sekretariatit ofrohet nga Sekretariati Shtetëror Zvicerian për Çështje Ekonomike (SECO).



Këshilli i Investimeve mbështetet nga Ministria e Financës dhe Ekonomisë, Banka Evropiane për Rindërtim dhe Zhvillim (BERZH) dhe Sekretariati Shtetëror Zvicerian për Çështje Ekonomike (SECO)